

Far ina pausa e sfegliar in cudesch rumantsch

Il Pausadi Viamala porscha era products rumantschs

■ **(lr/mp) Dapi tschintg onns datti la butia «Viamala Markt». En il sortiment dals products spezial è da chattar era da quels da la Lia Rumantscha.** La finamira da questa butia en il Pausadi Viamala en la regiun da Tusaun è dad esser ina fanestra vers la regiun. Cun porscher products indigens duai la valor agiuntada vegnir promovida ed augmentada, quai è il credo dals gestiunaris.

Chantun spezial

En la butietta da be var 30 meters quadrat pon ins cumprar differents products: da bains purils, da sanadad e bainesser, dad artisanadi regional sco era da la sparta culturala. Damai sa chattan chaschiel, salsiz e mel d'avieuls sper pomadas, tschintas e pitschens capricorns da lain. Spezialas èn per exempel las ideas da regal sco il chanaster da Viamala, il salid grischun u il pachet da contrabandier. Il sortiment vegn adattà cuntinuadamain e las tschintg employadas procuran per bunas ideas. Uschia han ellas creà in chantun spezial che mida adina puspè cuntegn.

Chantun rumantsch

Tar ils products culturals tutgan cudeschs. Ma i na dat betg be cudeschs tudestgs da cumprar. La butia purscheva gia products da la Lia Rumantscha. La purschida d'avant da dicziunaris per uffants, minidicziunaris, cudeschs da receipts e davart la situaziun linguistica da la Svizra vegn augmentada marcantamain. La manadra dal paussadi, *Gabi Monhart*, ha fatg la proposta da far or dal chantun spezial in chantun rumantsch. La Lia Rumantscha ha surdà a *Martina Dolf*, che è responsabla per il chantun, plirs artitgels en cumissiun, uschia che la stizun na sto betg pajar ils artitgels che na vegnan betg vendids durant l'acziun speziala. I sa tracta da dicziunaris cun purrets en format grond e da fablas sin dvd.

Per mintga cumpra in regal

L'acziun ha cumenzà avant quindesch dis e dura anc fin la fin da november. Ella sa drizza al client indigen tant sco al client che fa be la pausa sin ses viadi da transit. Sch'el cumpra in cudesch rumantsch survegn el in regal in ch'el po

tscherner sez. Quai èn p. ex. collis, lullis, colurs u ballas d'aua. Uschia datti per ina giada da cumprar cudeschs rumantschs en in lieu tut spezial, schizunt straordinari. Ed il viandant po passar tar sia pausa cun sfegliar in cudesch rumantsch.



Martina Dolf preschenta il chantun rumantsch en la butia dal Pausadi Viamala a Tusaun.